

---

## GUILLEM FIGUIEIRA.

7225.

**GUILLEMS FIGUERA** si fo de Tolosa, fils d'un sartor et el fo sastre. E quant li Frances aguen Tolosa si s'en vene en Lombardia. E sap ben cantar, e fez se joglar entre los citaudis. Non fo hom que saubes caber entre'ls baros ni entre la bona gen, mas mout se fez grazir als arlots et als putans et als hostes taverniers. E s'el vezia bon home de cort venir lai on el estava, il n'era tristz e dolens; et ades se penava de lui abaissar e de levar los arlotz.

7225, 7614.

**N**o m laisserai per paor  
Q'un sirventes no labor  
En servir dels fals clergatz;  
E quan sera laboratz,  
Conoisseran li pluzor  
L'engan e la felonía  
Que mou de falsa clerzia;  
Que lai on an mais forsa ni poder  
Fan plus de mal e plus de desplazer.

Aquist fals prezicador  
An mes lo segl' en error;  
Qu'il fan los mortals peccatz.  
Pos cels cui an prezicatz  
Fan so que ven far à lor,  
E tug segon orba via:  
Doncs si l'uns orbs l'autre guia  
No van andui en la fossa cazer?  
Si fan, so dis dieus qu'en sab be lo ver.

Vers es que nostre pastor  
Son tornat lop raubador ,  
Qu'il rauban devas totz latz.  
E mostran semblan de patz ,  
E confortan ab doussor  
Las oveillas noit e dia ,  
Pos quas las an en bailia  
Et il las fan morir e decazer  
Ist fals pastor , don ieu m'en desesper.

Pois fan autre dezonor  
Al segl' et à dieu major ;  
Que s'un d'els ab femna jatz ,  
Lendema tot orrezatz  
Tenra'l cors nostre senhor ;  
Et es mortal eretgia :  
Que nul preire no deuria  
Ab sa putan orrezar aquel ser  
Que lendeman deja'l cors dieu tener.

E si vos en fatz clamor ,  
Seran vos encuzador  
E seretz n'escumenjatz ;  
Ni , s'aver no lor donatz ,  
Ab els non aures amor  
Ni amistat ni paria.  
Vergina Sancta Maria ,  
Domna sius platz laissas me'l jorn vezer  
Que 'ls posca pauc dubtar e mens temer.

Vai sirventes , ten ta via ,  
E di m'à falsa clerzia  
Qu'aicel es mortz qui s met en son poder :  
Qu'à Toloza ne sab hom be lo ver.